

五臺
中條
姑射
壺口



欽定古今圖書集成

方輿彙編
山川典


欽定古今圖書集成方輿彙編山川典

第三十一卷目錄

五臺山部彙考

圖

考



山川典第三十一卷

五臺山部彙考

華嚴經之清涼山

五臺山即佛經之清涼山五峰高入雲表頂皆積土故謂之臺夏積冰雪故又名清涼山華嚴經言文殊師利居之在今山西太原府五臺縣東北一百四十二里周圍五百里中臺高三十九里東臺高三十八里南臺高三十七里西臺高三十五里北臺高四十里華嚴嶺聖鐘山清涼嶺金閣嶺皆此山之支裔也

山圖



五臺縣

五臺



古今圖書集成
考

按華嚴經疏清凉山卽代州鴈門郡五臺山也歲積堅冰夏仍飛雪會無炎暑故曰清凉五峰聳出頂無林木有如壘土之臺故曰五臺

按寰宇記五臺山在代州五臺縣東北一百四十里道經以爲紫府山內經以爲清凉山

按唐書地理志代州鴈門郡五臺註有五臺山

按地理通釋十道山川攷河東名山崞山在代州崞縣地理志名山無崞山有五臺山在代州五臺縣

按宋僧延一五臺山志五臺山本名清凉山華嚴經疏云清凉山者卽代州鴈門郡五臺山也以歲積堅冰夏仍飛雪會無炎暑故名清凉五峯聳出頂無林木有如壘土之臺故曰五臺海東文殊傳云五臺卽是五方如來之座也亦象菩薩頂有五髻華嚴疏文云此山磅礴數州縣五百里左鄰恆岳隱嶙參天右控洪河縈迴帶地北臨朔野限雄鎮之關防南擁汾陽作神州之勝勢迴環日月畜泄雲龍雖積雪夏凝而奇花萬品寒風冬冽而珍卉千名丹障橫開翠屏

古今圖書集成
壘起排空度險時逢物外之流捫蘿履危每造非常之境白雪凝布疑淨練於長江早日熾升認扶桑於大海大唐神州感通錄云代州東南有五臺山者古稱神仙之宅也山方五百里勢極崇峻上有五臺其頂不生草木松柏茂林森於谷底其山極寒南號清涼山山下有清涼府經中明說文殊將五百仙人住清涼雪山卽斯地也所以古來求道之士多游此山靈蹤遺窟奄然在目不徒設也中臺至高去并七百望如指掌上有小石浮圖其量千許卽後魏文帝宏

所立也石上人馬之跡宛然存焉頂有大泉名曰太華澄清似鏡有二浮圖夾之中有文殊師利像人有至者鐘聲香氣無日不聞神僧瑞像往往逢遇又按靈記五臺有四埵去臺各一百二十里據古圖所載今北臺卽古中臺中臺卽古南臺大黃尖卽北臺栲栳山是西臺漫天石是東臺惟北臺中臺古時有異東西二臺古今無異無恤臺常山是也昔趙簡子名無恤曾登此山觀代國下瞰東海蓬萊宮觀神仙之宅此是普賢菩薩於中止住雲霞出沒往來五臺登

古今圖書集成
臺者多見靈瑞緣斯聖跡故號爲東埗也西晉臺山上
有宮池古廟隋煬帝避暑於此而居因說天池造
立宮室龍樓鳳闕徧滿池邊此池世傳神龍所居緣
斯聖跡故號爲西埗也南有繫舟山上有銅鑲船軸
猶在昔堯遭洪水係舟於此世傳堯覩文殊見於南
臺緣斯聖跡故謂之南埗也北有覆宿堆卽夏屋山
也魏孝文往覆宿此因以名焉下見雲州石窟寺世
傳山上有乾闥婆城卽化城也常於日欲出時城乃
現又望見北月吳塚壘壘有鬼趨南行及見南山柏

各蘂出隨行文帝叱之其蘂卽迴低曲而走因謂之
亞走柏緣斯聖跡謂之北埗也唐儼禪師神異僧也
嘗登南臺之上望見五頂皆有五色雲覆之隨雲覆
者配之爲臺中臺頂上有太華池方圓二里天生九
曲其水湛然色若琉璃澄澈見底池內平處有石磊
落叢石間復有名花百品交映神龍宮宅之所在焉
人暫視之慘然神駭雲霧祥映難以具言然池之大
小淺深神變不定故禮謁者解纓褫珮投中而去古
十寺大字靈鷲王子靈峰飢仙天盤清涼石窟佛光

古今圖書集成
卷之六
石昌樓觀今益唐來寺六竹林金閣安聖文殊玉華
聖壽靈跡四太華池白水池孝文人馬跡千年冰窟
名花五日菊花孝文十二院花五鳳花百枝花鉢囊
花北臺頂上有天井下有龍宮白水池相連金剛窟
亦相通徹古有八寺寶積淨明木瓜普濟公主甘泉
火谷聖壽今益寺二寶山太平興國靈迹十六七佛
池羅漢臺九女泉公主臺孝文教鷹臺孝文打球塲
仙人菴禪菴蘂亞走柏生死蘂空心蘂生地獄鄧隱
峰塔憨山玉泉金井異草二雞足草菅薹草東臺舊

名雪峯山麓有研伽羅山臺上遙見滄瀛諸洲日出
時下視大海猶陂澤焉古寺一十五華林香雲觀海
乳頭香蘂銅鐘石堂龍盤光明萬像鳳嶺龍泉五王
天城溫湯古華嚴今益寺三金界乾明東塔院靈跡
十二松子戍赤龍口六鳳巖明月池五王城棗林乳
頭香蘂研伽羅山那羅延窟萬聖足跡溫湯藥三人
參長松茯苓西臺與祕魔巖相連危磴干雲喬林拂
日分空絕壁接漢層巒古寺十二祕密石門榆勒乳
石東尖大會日照向陽鐵勒浮圖熊頭豹子今益寺

古今圖書集成
四李牛黑山仰盤病牛泉靈蹟一十五泥齊和尚孝
文射塚落王崖香山獅子蹤于闐國王蹤二聖對譚
石八功德水石門鳥門龍窟薩埵崖王子燒身塔割
肉坐石王母仙桃藥三黃精茯苓木瓜南臺孤絕距
諸臺差遠林麓蒼鬱巖崖傾欹最爲幽寂昔有僧明
禪師居此三十餘載亦遇神仙飛空而去惟蟬蛻其
皮三十里內悉是名花徧生峯岫俗號仙花山化寺
屢逢鐘聲時發昔有人遇異人形偉冠世言語之間
超騰遂遠故僧明禪師歌曰南臺秀峙龍神歸依春

雲靄靄夏雨霏霏黑白瞻禮失渴忘疲何罪不滅何
福不滋臥于石罅而坐神龜菩薩麻充其龍枝羅浮
草結作禪衣居巖壑兮靜慮履山巔兮尋師食松長
智餌菊除飢講說般若志行禪師再覩龍母又見龍
兒家施白藥永離苦衰古寺九娑婆殊公郭嬖嵌巖
浮圖高嶺石臺小柏赤崖今益寺三福聖靈境法華
靈跡九七佛谷龍宮勝堆萬畝平東王相西王相神
龜東車尖西車尖石罅藥二人參鐘乳中臺北北臺
南中有諸佛浴池一百二十所四面是水中心有土

臺方圓三尺號爲菩薩盥掌遊戲之地其水香氣氛
馥色相光明人熟視之神移目亂不敢久住然人亦
罕到池中多出白雲狀如隊仗有梵志婆羅門像金
剛窟卽文殊大宅此窟在東北臺二麓之下樓觀谷
內南北嶺間有石門乃先聖出入之處人多不識昔
有繁峙縣佛慧師曾入此窟行約三十里有橫河旣
濟卽抵平川無復凡水但見寶林極望四周金樓瓊
塔炳然晃日佛慧後出爲人說此

按圖書編山西山攷五臺山在五臺縣東北一百四
十里環五百餘里山有五峯高出雲表頂皆積土故
謂之臺佛經云北方文殊師利所居曰清涼山卽此
山中圓光不時呈現亦時有金蓮鉢囊熟綿花之瑞
柳宗元曰雲代間有靈山焉與竺乾鷲嶺角立相應
王琮詩靈跡傳聞事不虛好山多是異人居雄臨絕
塞風霜古寒逼新春草木疎百里行看層巘出五峯
坐見彩雲舒四時利澤霑羣品誰識楊枝一灑餘中
臺高四十里頂平廣周六里頂西北有太華池取水
禱雨輒應正東左畔去臺五里有雨花池前三十里

古今圖書集成
有飯仙山卽中臺案也東西有鷲峰西側有甘露池
蔣瑄詩丹崖碧嶂聳奇觀天近星河壓衆巒雨少四
時山有潤雪多九夏地偏寒平吞嶺海煙波闊遠接
天池宇宙寬萬籟此間俱寂寂惟聞鐘磬出巖端東
臺高三十八里頂平廣周三里頂東畔有那羅延洞
僅容人身側入洞中風寒盛夏有冰五色光彩嘗從
內出又東有樓觀谷內有習觀巖西北去臺十五里
有華巖嶺仙人洞東南嶺畔二十里有明月池人傳
以紗帛障目下覩或見月在水中西南有青峯一日

大羅頂南連望聖臺臺下有東谷池西南石上有羅
侯顯跡又有善才庵又東去臺有溫湯池溫泉寺釋
覺同詩度險凌寒上翠巒東臺風景望中寬深藏佛
境乾坤大遠鎮皇圖社稷安天雨飛花香冉冉海波
浮日影團團幾回笑指蓬萊島三點青峯似髻蟠西
臺高三十五里頂平周二里頂上有魏文帝人馬跡
北有祕魔巖洞天隱中有聲如風西嶺畔有薩埵崖
捐身崖去臺西北有八功德水東北下有文殊洗鉢
池釋覺同詩西嶺崑峨接遠蒼回瞻鄉國白雲傍孤

古今圖書集成
峯嶺翠連三晉八水分流潤四方晴日野花鋪蜀錦
秋風仙桂落天香當年獅子會遺跡巖谷常浮五色
光南臺高三十七里頂平廣周二里南去七十里麓
畔有聖僧巖又名滴水巖南二十里西崖畔有三賢
巖又名七佛庵東三十里交口下有聖鐘山狀如覆
鐘西北一十五里有清涼嶺嶺西北有清涼泉上有
羅漢洞東北有竹嶺東南十里有金閣嶺蔣誠詩融
融日午麗崇臺四面山光罨畫開清磬有聲常出樹
古碑無字漫封苔安禪老衲忘生滅解脫神仙任去

來多少路傍經過客登臨不惜重徘徊北臺高三十
八里頂平廣周三里名掖斗峯頂南畔有羅侯臺臺
頂有黑龍池卽天井南下二十里有白水池與天井
連其水經繁峙縣峨谷口入滹沱其麓有七佛池南
又有飲牛池東北有寶峯又名寶山產銀石碌又產
天花菜東北二臺麓有金剛窟又名金剛洞去二臺
各二十里昔佛陀波利入此不出

按山西通志山川五臺山在五臺縣西北一百四十
里山五峰高出雲表頂皆積土故謂之臺佛經云北

方有文殊師利所居之地曰清涼卽此也

聖鍾山與五臺山相連有仙寺嶺三賢巖習觀巖聖僧巖青風寶陀嶺勝蹟二十二處

按太原府志山川五臺山在五臺縣東北一百四十二里環五百餘里五峰高出雲表頂皆積土故謂之臺又名清涼山臺分東西南北中寺宇壯麗山中圓光時現

按五臺縣志山川五臺山在縣治東北一百二十里世傳文殊師利所居之地

橋梁西巡橋在臺山塔院寺前舊名巡檢司橋今名西巡橋

村屯出縣北門至蕭家河正東去上坡三里爲滹陽嶺依嶺建刹殿閣頗麗爲臺山西來第一山門

按清涼山新志化宇震旦之有清涼山者乃文殊菩薩之化宇也亦名五臺以歲積堅冰夏多飛雪曾無炎暑故曰清涼五峰聳峙頂無林木若壘土然故曰五臺地連鴈代盤礴數州周五百餘里左鄰恆嶽右俯滹沱北凌朔塞南瞰中原爲大國之屏藩作幽燕

古今圖書集成
之襟帶五峰中立千嶂環開縈紆盤鬱無非梵行之
棲隱顯高低盡是真人之宅雖寒風勁冽瑞草爭芳
積雪瀾漫名花競發白雲凝布奪萬里之澄江杲日
將昇化一川爲大海此其常境也若夫精心鑽仰刻
意冥求聖境靈區隨時幻化或神燈觸目或佛光攝
身或金閣浮空或竹林現影金剛窟裏列聖森森澡
浴池邊羣真濟濟披霞撥霧身登物外之天躡石捫
蘿步入非常之境實百靈之奧府乃萬聖之幽都其
間靈異匪得名言徵其源也乃曼殊大願之所持如

幻三昧之所攝無方無體非色非空觸類而彰應心
而注故得染煙麁氣咸資般若之光觸體沾雲悉植
菩提之種大疏云自大師晦跡於西垂妙德揚輝於
東夏雖法身常在鷄山空掩於荒榛應現有方鷲嶺
得名於茲土自非大士慈雲瀾漫智海汪洋廓法界
以無疆盡衆生而爲願孰能感應若斯之盛哉或問
域內名山有五古帝王四時巡狩以時祀之而泰山
梁父爲四嶽長於茲封禪載諸經史詳矣今文殊大
士居清涼山而令海內傾心亦有所考證乎答曰大

華嚴經云東北方有處名清涼山從昔已來諸菩薩
衆於中止住現有菩薩名文殊師利與其眷屬諸菩
薩衆一萬人俱常在其中而演說法又寶藏陀羅尼
經云佛告金剛密跡王言我滅度後於此瞻部洲東
北方有國名大震那其中有山名曰五頂文殊童子
遊行居住爲諸衆生於中說法及有無量天龍八部
圍繞供養斯言可謂審矣此外自古及今神人顯彰
甚多漢明帝時摩騰竺法蘭者四果人也始至此土
以天眼觀卽知此山乃文殊住處兼有育王所置佛

舍利塔又宇文後周時有化人來遊此土云禮迦葉
佛說法處并往清涼文殊住處至山忽化現文殊像
騰空不見乃知卽文殊化身又唐初師子國僧跣足
而來禮清涼山又唐道宣律師感諸天人常來侍衛
咨詢諸天冥遠之事無不詳答極言清涼山爲文殊
所居靈異彰著已上諸條並出感通傳故藍谷云此
土名山雖嵩岱蓬瀛皆編外典未有若清涼出於佛
口傳於龍藏宅萬聖以敷化冠五印以飛聲美曜靈
區利周賢劫者也問曰有云劫火洞然此山不壞以

古今圖書集成
今觀之山石之隕潰林木之代謝擊之則裂火之則
灰事理之常安得歷三災而不壞耶答曰化相則壞
真相不壞故法華經云大火所燒時我淨土不毀如
身子見娑婆丘陵土石斯可壞者也螺髻見如自在
天宮斯不可壞者也然真之與化非一非異如鏡中
像非卽是鏡亦非離鏡有像可得如夢所見雖非本
身然離本身無別夢境故楞嚴經云譬如日眚矚燈
光中別現圓影彼非眚人則無所見衆生以無明故
妄見山河諸有爲相聖則不見又如法界品中如來

入師子奮迅三昧逝多園林卽有無盡功德莊嚴云
云二乘在會不見不聞乃至云如是皆是普賢菩薩
智眼境界不與一切二乘所共以是因緣聲聞不見
是知真境無殊悟迷斯隔推此可知據上所論真土
無邊獨曰此處不壞者欲令歸心專一又如窺一隙
之空卽見無盡之空云爾

靈蹟五臺亦曰五峯臺者言其高平峰者言其峭拔
列爲五者觀國師云表大士五智已圓五眼已淨總
五部之真祕洞五陰之性源故首建五佛之冠頂縮

古今圖書集成
五方之髻運五乘之要清五濁之災其東西南北四
臺皆自中臺發脉羣嵐聯屬勢若遊龍惟南臺獨秀
而寫居丁位高三十七里頂若覆盂周一里山峯聳
峭烟光凝翠雜花彌布猶若鋪錦亦名錦繡峯其靈
跡二十一日

仙花山卽南臺山名

普賢塔臺山

古南臺臺南二里嘉靖間香林大士卓菴其上
石城臺南二十里四山壁立若城

石罅神龜仙花山南麓

白龍池臺東南麓

插箭嶺臺東二十里宋太宗北征至此見菩薩現八
臂相插箭而還

萬木平臺西南四十里唐李澄師莊

龍宮聖堆近娑婆寺龍母聞法化去龍池卽湧爲堆
聖鐘山臺南八十里昔有神鐘飛來懸於巖下後飛
鳴而去今鐵盧尚存

聖僧崖亦名滴水崖臺南七十里唐貞觀中梵僧於

古今圖書集成
此立化

古竹林臺西南三十里唐法照入聖境

虎陽嶺西南三十餘里佛陀波利見文殊處有尊勝幢存焉虎陽河源發此

志公洞清涼石南

法華洞志公洞前

七佛洞臺西南二十里古有七梵僧至此入寂不起遂立七佛像

千佛洞臺東北崖畔嘉靖間僧道方者夜遊至此見

神燈萬點既出旋入方隨入見玉佛像森列其中更進則聞波濤之聲悚懼不能出因持觀音名號願造聖像旋見一燈前導而出卽洞造像焉

金閣嶺臺西北昔人見空中金閣因建寺擬之

天盆谷金閣嶺之左山若仰盂

蛇溝天盆之北亦名車溝

海螺城天盆東昔人見化城若海濤盤旋之狀

東臺高三十八里頂若鰲脊周三里蒸雲浴日爽氣澄秋東望明霞如陂若鏡卽大海也亦見滄瀛諸州

古今圖書集成
因名望海峯東溪之水北注滹沱東南四十里入阜平縣界西北二十里入繁峙縣界其靈蹟一十四曰那羅延窟臺東畔其內風氣凜然盛夏有冰燈光時現華嚴經云是菩薩住處亦是神龍所居
笠子塔臺頂宋宣和間代牧趙康彌同慈化大師見異僧入那羅窟留斗笠建塔藏之

觀音坪臺北麓一里

華嚴谷臺西北今名東臺溝

棗林臺東北後魏永安二年恆州刺史家人逐白鹿

至此有白鬚長者扶杖立大宅門外指其人食棗療飢再往尋之不可蹤跡矣

五王城臺東北建梵宇

天城五王城側靈跡記云天城卽化寺也不依地立迥出雲霞之表珠樓紺殿皎若天成得遇之人塵機頓息

大會谷臺東衆溪交匯滹沱源出此

華林臺東南二十里卽古華嚴

溫泉臺東南七十里

古今圖書集成
馬跑泉臺東南六十里

龍泉關臺東南六十里

舊路嶺臺東南五十里

鐵鋪臺南五十里

棲賢谷臺西南溝古德藏修處也

觀音洞棲賢谷巖畔有滴泉味甘

化竹林臺西南支山二十里昔人遠望萬竹森森近

則失之遂此卓菴

青峰化竹林南今名大螺頂有不語僧久立不坐臥

人亦以立禪呼之

現聖臺青峯之南唐觀國師常見萬聖羅空五雲停

岫

明月池臺西南昔人晦夜見皎月澄池

石佛嶺池南二十里

漫空石東臺頂盛夏流液人結屋覆之

研伽羅山卽東臺山名梵語未詳

紫府五臺之總稱也趙無恤獵常山西占紫雲之瑞

黃巍嶺張商英見神燈隱現

古今圖書集成
觀來石未詳出處

西臺高三十五里頂平周廣二里月墜峯巔儼若懸鏡因名掛月峯其上有泉羣山拱合巖谷幽邃四十里至繁峙縣界其靈蹟十七曰

魏文帝人馬跡相傳魏文帝至此避暑

八功德水臺北

二聖對談石唐法林見緇白二叟對談石上近之則失

獅子蹤對談石下

牛心石臺東有石狀若牛心

支殊洗鉢池臺東北昔有白髮母洗鉢於此僧明信問從何來母云中臺乞食而來言訖忽隱惟見光暎林谷

泥齋和尚習定處臺東北昔有神僧住此以泥作饌食之

鳥門臺西北隅

龍窟臺西麓

石門臺西南谷中

古今圖書集成

方輿彙編山川典第三十一卷五臺山部彙考之十九

古今圖書集成
李牛谷臺西北三十里

禪堂溝臺西北

峩谷臺西五十里

祕魔巖臺西四十里木叉和尚所居

龍洞祕魔巖懇禱則龍現大小不等

薩埵崖祕魔巖之西古有代州王氏女不欲配逃於

此食薇飲露父母逼之女投崖未及地飛昇而去

香山中西二臺之間

北臺高四十里頂平周廣四里仰視峰巔上薄斗杓

因名叶斗峰風雨雷電惟出半麓雲氣瀰漫旋覆蓋
爲龍帝之宮也東瞻海洋北眺沙漠聿爲鉅觀四十
里至繫峙川前衆溪發源入清河其靈蹟二十七曰
黑龍池亦名金井池有龍神祠四方之民禱雨輒應
說法臺臺東人遊觀者時聞鐘梵之音

鄧隱峰塔叅馬祖歸飛錫解戰倒化於北臺妹爲建
塔近僧明來重修

生陷獄臺後麓隋繫峙民張愛盜龍池錢將歸暴風
忽起吹墮於此上俯巉崖下臨絕澗黑雲四合冰雪

湧身求出不得乃哀號稱菩薩名經宿雲開見白兔引之出

羅漢臺臺東唐十六梵僧集此同化去

華嚴嶺臺東南二臺之間

樓觀谷臺東南二十里

金剛窟在樓觀左崖畔乃萬聖之祕宅祇洹圖曰三世諸佛供養之器俱藏於此迦葉佛時楞伽鬼王所造神樂及金紙銀書毗奈耶藏修多羅藏佛滅度後悉收入此昔佛陀波利入此不出

白水池樓觀谷後其泉若乳人取滌眼

五郎祠樓觀谷西宋楊業第五子出家處

玉泉無著見化人於此飲牛

紫霞谷臺南俗呼北臺溝清涼最深處禪侶所棲

龍門臺南麓下有留雲石北有藏雲谷雲出爲雨雲

入爲霽胡順菴刺舌血書華嚴經處

金沙泉龍門側

仙人菴臺後麓

九女泉臺後七里昔有九仙女浣濯於此

古今圖書集成
藏真谷臺西北五百梵僧藏修之地

大黃尖臺北二十里卽古北臺

卓錫泉在蘭若寺唐初僧道賢縛茅藏修艱於得水
偶客僧至索浴賢遠汲澗下明日僧欲浣衣賢復負
器汲水器破賢易器再往略無怠色其僧歎曰子可
謂誠矣卽卓錫菴前命賢拔之甘泉隨拔而出僧持
錫彈指騰空而去

憨山昔有梵僧從魏文帝丐一臥具地帝許之其僧
展具覆五百里帝知爲神僧不顧馳馬徑去山隨後

逼之帝還顧曰汝憨耶山乃止因此得名

文岫山臺西北四十里

寶陀山臺北四十里亦名寶山

秦戲山臺東七十里山海經云秦戲之山無草木多
金玉滹沱之水出焉亦名派山

品字泉在秦戲山卽滹沱源西流由北臺之陰注達
真定

中臺高三十九里頂平周廣五里蒼崖拔地翠靄浮
空因名翠巖峰與西北二臺肩臂聯接南矚晉陽北

凌沙塞有五溪發源二溪左注清河三溪右由西臺
下出峩口入滹沱焉水經云峩谷之水出於中臺卽
此也其靈蹟二十有八曰

靈鷲峰臺懷小山今稱菩薩頂宛若西天靈鷲山故
名

甘露泉峰右

大寶塔靈鷲之前五峰之中漢摩騰天眼見此有阿
育王所置佛舍利塔歷代帝王不廢修飾明神宗母
慈聖太后重建高入雲漢神燈夜燭清涼第一勝境

也

佛足碑大塔左按西域記云摩竭陀國波吒利精舍
大石釋迦佛所遺雙足跡其長一尺六寸廣六寸千
輻輪相十指皆現花文中字寶瓶魚劍之狀光明炳
耀昔佛北趣拘尸那城將示寂滅回顧摩竭陀國蹈
此石上告阿難言吾今最後留此足跡以示衆生有
能見者生大信心瞻禮供養滅無量罪常生佛前如
來旣寂諸外道輩妒嫉聖蹟除剗愈顯如是八番文
理如故唐貞觀中元奘法師自西域圖寫持歸太宗

古今圖書集成
勅令刻石祖廟以福國祚明萬曆壬午秋少林沙門
明成如意二僧募衆緣摹寫刻石中臺
文殊髮塔大塔東昔菩薩化貧女遺髮藏此萬曆間
方廣道人修塔見髮色若金光彩無定
般若泉大塔左唐僧慧潛結庵於此日課金剛經感
庵側湧泉因名之

雜花園大塔前唐代築戒壇今爲荒址

鳳林谷臺東南

西天洞鳳林谷北嶺

梵仙山臺東三十里中臺案山昔有五百仙人餌菊
成道

井溝梵仙山西

楊柏峪井溝南

九龍岡臺南近竹林寺

令公塔岡畔宋楊業殉節其子延朗收遺骸建塔
竹林舍利塔臺南竹林寺前成化間耕者得石椁內
藏銀匣中貯琉璃瓶盛舍利數百顆光色璀璨匣上
刻字僧雲宗寶藏弘治間燕京穆氏建塔嘉靖間古

燈重修

竹林小像寺中如來像一龕製度精巧絕倫

清涼谷臺南四十里

古清涼清涼谷中僧法聚構蘭若

清涼石清涼谷嶺西厚六尺五寸圍四丈七尺面方
平正自然螺紋能容多人不隘昔有異僧趺坐其上
爲衆說法梵音琅琅狀貌可畏卽之則失後人目其
坐處爲曼殊狀

清涼泉清涼谷北巖

羅漢洞清涼寺北

清涼橋臺南溪上

萬年冰臺東麓有冰數丈九夏不消桃李樹生於冰
孔夏初盛開

寒山石臺東南三里

玉花池臺東南麓昔有五百梵僧於此休夏池生白
蓮堅瑩如玉代牧以石築之

伽藍溝臺西北

萬聖澡浴池中北二臺之間古有湧泉澄潔可愛遊

古今圖書集成
人每見天光雲影之間有天仙沙門蓮花錫杖之狀
相傳爲菩薩盥掌之所四方善信多持香花拭巾投
之後人浚鑿砌石構亭覆之而靈蹟隱矣

太華池在臺上西北隅其水隨人所見深淺不一臨
池顧影可辨毫髮

祈光塔臺西南隅成化間秋崖法師同晉王祈光遂
願故建此塔

臺中舍利塔唐藍谷法師從梵僧乞得舍利造鐵塔
盛之外建大塔萬曆間塔欹將傾一夕雷雨大震塔

正如故

獅子窩中臺西南嶺昔人見萬獅遊戲其中萬曆丙
戌僧智光淨立等約五十三人構室結淨社惟十方
學道者共居不許子孫承業

古志以大黃尖爲北臺叶斗峰爲中臺翠巖峰爲南
臺後以錦繡峰靈瑞顯彰大士頻現且與四峰鼎立
故酌定以爲南臺則翠巖居中叶斗爲北矣况大黃
尖乃叶斗支山比之叶斗殆若培塿固不足以當五
峰之列藍谷傳以中臺高於北臺則悞指古北臺也

古今圖書集成
按妙濟傳五峰之外復有四埵東曰青峰埵卽常山
趙襄子曾登亦名無恤臺南曰朱明埵卽方山李長
者著論處西曰鶴林埵卽馬頭山亦名磨笄山代子
夫人磨笄處也北曰元冥埵卽夏屋山亦名覆宿山
古帝王避暑處然四埵之名好事者所立於聖教無
考焉

五臺山半麓以上林木童然惟香草叢生至夫溪壑
之間異草雜花不可悉記而金芙蓉則他方所無更
如靈芝神藥得而啖者足以洞宿命易仙骨然非肉

眼所能輕識也今據妙濟傳略附錄花藥於左
花曰日菊晝開夜合

金芙蓉亦名金蓮花陸地蓮

百枝香氣如松柏

鬼見愁生臺麓能驅邪

鉢囊世傳五百羅漢結夏中臺遺其鉢囊化爲此花
他處名荷包花

玉仙亦名大吉一生南臺

天花菌類生於柴木臺山佳品最不易得

古今圖書集成
異草曰菅薹 鷄足 菩薩線

藥草二十五種茯苓 長松 黃芪 黃精

黃蓮 木瓜 茵陳蒿 大黃 赤芍藥 桔梗

麻黃 藜蘆 白芨 天麻 烏藥 細辛藤

甘草 柴胡 百合 沙參 小茴香 管仲

木賊 秦艸 蒼朮

藥石一種曰鐘乳石

迦藍臺懷佛刹凡六十四曰

大顯通寺古名大孚靈鷲寺漢明帝時摩騰法蘭二

大士西來見此山乃文殊住處兼有佛舍利奏帝建
寺騰以山形若天竺之靈鷲卽以爲名帝始發信心
加以大孚二字解爲弘信也後魏孝文帝重葺環山
復置院十二以擁護茲刹前有雜花園亦名花園寺
唐太宗復加修建則天朝以新譯華嚴經中載此山
名改爲大華嚴寺清涼國師駐錫造疏鈔明太宗特
勅重建以感通神應傑出震旦改大顯通寺賜額莊
嚴勅旨護持凡十餘道永樂三年增設僧綱司率合
山僧衆祝釐焚修代州月給僧糧至嘉靖間始革其

糧

大文殊寺卽菩薩頂真容院唐僧法雲創建擬塑聖像塑工安生者請言聖儀雲曰大聖德相我何能言相與懇禱求菩薩現身經一七日忽於雲光之際顯現全像金碧照耀慈容相好遂圖模塑成因名真容院歷代修葺明永樂初奉勅改建大文殊寺頒賜貝葉靈文梵書龍藏御製序讚成化七年內造鍍金文殊乘獅行像運供本山萬曆辛巳遣太監李友重修大寶塔院寺顯通之南五峰之中有育王所置佛舍

利塔及文殊髮塔因以爲名永樂五年始建寺萬曆戊寅重修恢巍壯麗冠於清涼

大圓照寺顯通之左古稱普寧寺永樂初印土僧室利沙者來此土詔入大善殿坐論稱旨封圓覺妙應大善國師賜金印旌幢送居臺山顯通寺宣德初復召入京廣宣祕密無何啓辭歸山上未許明日示寂上爲傷悼勅依法茶毗分舍利爲二分一於都城建寺曰真覺一於臺山普寧寺基建寺曰圓照正德間設都綱司於此

古今圖書集成
大廣宗寺鷲峰南正德初建鑄銅爲瓦今稱銅瓦殿
命秋崖等十高僧住持

羅睺寺塔院寺東北隅張無盡見神燈於此成化間
趙惠王重修

廣緣寺鷲峰東古大王寺相傳古有王子棄國出家
於此後有妃子寺卽王妃出家處

法王寺妃子寺後

普濟寺華嚴谷亦名北山寺

般若寺樓觀谷無著見文殊處童子送出指曰此般

若寺也後人因爲建寺於此成化間立禪和尚道行
聞於晉王捐資重建

太平興國寺在樓觀谷宋沙門睿見結廬於此持律
精嚴緇白皈信太宗平晉聞師道行詔建太平興國
寺以師主之卽楊延朗之師也中有五郎寺後有真
寶者代州僧殉靖康之難

法雲寺在華嚴嶺唐三昧姑開化處代藩中官王朝
捐資重修

普恩寺在普濟寺東舊稱西天寺明洪武間梵僧室

古今圖書集成
利板的達止此詔入京奏對稱旨賜龍章護持正統
間賜藏經

平章寺金建

報恩寺並在華嚴谷久淪榛莽

金界寺在華嚴谷唐建張無盡見神燈於此成化初
清玉禪師重修

萬壽寺亦名玉花寺在中臺東南麓隋有五百應真
棲此龍神修供有騾數十頭不用驅策自能入市運
糧朝往暮歸率以爲常其時池生白蓮堅瑩如玉七

日乃萎代收建寺卽名玉花明末樂初改名萬壽

鐵瓦寺在玉花池南三泉之水入焉

壽寧寺在三泉寺南古名王子焚身寺北齊帝高洋
第三子自識宿命於此燃身供聖烈焰中菩薩現形
內侍劉謙之回奏勅爲建寺唐普雨大師奏昭宗重
修撥州田百頃充常住膳僧宋景德初改名壽寧元
華嚴菩薩者果位人也禪定於此成英二宗先後駐
蹕命右丞相巴思重爲修葺焉

西壽寧寺元碧峰建

古今圖書集成
三塔寺在鷲峰之西

殊像寺在梵仙山左有文殊大士跨狻猊像神功所造也

日光寺在鳳林谷嘉靖初獨峰和尚建

寶林寺在日光寺北嘉靖間古燈禪師建

鳳林寺嘉靖間徹天和尚卓錫有盜至見二虎據門因呼二虎禪師

護國寺在鷲峰南二里元成宗勅建真覺國師住此著慧燈集

帝釋宮卽今玉皇廟

碑樓寺在宮南

萬聖佑國寺在交口東山麓元海印大師居此注肇論英宗爲建寺賜號弘教大師

觀海寺在明月池側元魏建明成化間月舟禪師修鎮海寺在交口西南嶺下

雷音寺在海螺城

雲集庵在曉天梁

天聖寺在井溝明嘉靖間建

靈峰寺在陽白峪唐建明成化間義賓大師結五十
三人叅禪於此國戚周善世來遊見之感動割資三
千餘金重修

中峰寺

聖水寺

天城寺三寺俱在陽白峪皆靈峰寺支院

天盆寺依山得名

日照寺在天盆谷

金燈寺在南臺東北麓

金閣寺南臺西北嶺畔昔人見金閣浮空卽其地建
寺

竹林寺中臺南三十里唐法照悟入化竹林因創寺
志奇跡

清涼寺中臺南四十里唐宋設僧正司於此

智導庵中臺南麓卽清涼泉之崖畔

望海寺東臺元建

普濟寺南臺宋建

法雷寺西臺唐建

古今圖書集成
靈應寺北臺惟此寺最高風極猛厲往者多凍餒亾
軀隆慶初釋圓廣與徒明來構屋開粥糜以濟饑寒
萬曆間僧佛秀募造文殊大像未就而寂感夢慈聖
太后範金鑄像遣中官陳儒送峰頂建梵宇爲祝釐
焉

演教寺中臺唐建有舍利藏於鐵塔

淨土庵棲賢谷嘉靖間玉峰和尚開山廣修淨業卽
以名庵

龍興庵棲賢谷嘉靖初太虛和尚卓錫於此初住茂

林無人居正旦見金色女手執蓮花立石上俄而不
見祥光滿谷已而叢林鼎盛接待方來爲臺山之冠
因中夜聞龍吟故名

靈鷲庵在華嚴谷東

大盞庵在紫霞谷羣峰拱抱茂林森秀無邊禪師受
法於臨濟下二十八代楚峰和尚峰嘗囑曰爾後有
盞飯當共衲子食嘉靖甲子卓庵於此掘得銅盞受
斗粟遂成叢林

靜林庵在紫霞谷釋眞雲建雲爲中峰和尚嗣

古今圖書集成
雜華庵在塔兒溝僧正叅建

法雲庵卽古彌陀庵憨山大師德清居此清幼歲人皆呼爲清郎萬曆乙亥與友妙峰卓庵於此掘地得石座上泐清郎居三字若爲預識

大林庵在鳳林谷金陵素庵法師構

龍樹庵在車溝嘉靖初實印楚峰玉堂三師同叅大川和尚川記曰向去三人載一車後至蛇溝共結茅而居遂成叢林蓋蛇溝舊名車溝也
棲鳳庵在天盆北嶺嘉靖間寶峰建

華嚴庵在棲鳳庵東北嘉靖間僧古檀誦華嚴於此白頭庵南臺東北十里昔有行者生而皓首神異頗多嘉靖間結廬於此後不知所之

臥雲庵在中臺西南麓

不二樓在西臺北倚二聖對談石嘉靖間慧月法師於此見文殊淨名二聖對談華嚴曰趣亦名華嚴樓臺外佛刹凡三十六南臺外曰

靈境寺去臺二十里成化間釋清善建

石塔寺在臺東南亦名小柏寺

娑婆寺在臺西南三十里北齊釋元頤卓庵於此有婦攜子數來聽經頤疑而問之婦曰我名娑婆乃龍母也因聽法得悟將脫鱗甲矣頤曰斯言誰當信之母指池曰我若真悟無生此深淵涌成高阜言訖隨手而起卽成高阜龍亦化去後人目其阜曰龍宮聖堆頤於此建寺卽以龍母名名之

佛光寺在臺西南四十里魏文帝見佛光之瑞因名唐解脫和尚藏修之地

嵌巖寺在臺南六十里魏文帝建

聖福寺

赤崖寺

法華寺

殊公寺並在仙花山之陽

東臺外曰華林寺在古華嚴唐建明朝四修

香雲寺與華林相連

香蘂寺在華林東中有乳頭香蘂

慈雲寺在香蘂之南

龍蟠寺在大會谷山勢若蟠

古今圖書集成
鳳嶺寺與龍蟠相鄰

溫泉寺在臺東南五十餘里元重修

銅鐘寺在大會谷中昔有古鐘受三十斛雕文鏤藻
神彩煥發寺僧慧燈受戒赴京及歸已失之徘徊愴
惻默告大聖忽聞空中報曰鐘乃拘樓秦佛時兜率
天王所造今收入金剛窟中爾何求耶燈乃著銘泐
石記之

龍泉寺在臺東南舊路嶺宋建嘉靖間重修

西臺外曰祕密寺在祕魔崖巖谷最深唐木叉和尚

始建

圭峰寺在峩谷隋建

豹子寺

熊頭寺

向陽寺

育王寺

望臺寺

石門寺六寺並在峩谷隋唐所建

鐵勒寺臺西南六十里鐵勒山唐慧洪大師建

古今圖書集成
北臺外曰寶積寺在臺北谷中

木瓜寺在臺北谷中

普濟寺在大黃尖南麓唐建

公主寺在臺西北後魏誠信公主出家建唐末唯德禪師重修

淨名寺在臺西北繁峙縣南唐建宋興國年重修勅建金元復修葺

正覺禪院在臺北臨滹沱宋稱天王院宣和間爲黃冠侵改神霄宮有真容院僧請復爲佛寺請勅於朝

乃賜今額

清源寺在大黃尖下二十里元建羣峯環抱關西僧戒喜參悟中和尚久而辭去中記之曰爾緣在北逢源而止明萬曆初至此卓庵掘地得古碑名清源院卽以顏之

蘭若寺在大黃尖北二十里唐建明萬曆初法華道者掛錫於此宋谷天宮二寺入焉

普光寺今名黎峪寺在文岫山壁峰金禪師藏修處也明洪武間勅修上賜詩旌之金公常依華嚴製爲

古今圖書集成
懺法梵音婉雅凡四十二奏唯本寺襲其法四方學者於茲觀頂受業焉

欽定古今圖書集成方輿彙編山川典

第三十五卷目錄

中條山部彙考

圖考

中條山部藝文一

中條山居記

唐司空圖

休休亭記

前人

題王官谷

宋李處質



題王官谷

黃通

題王官谷

呂誨

方山靈峯寺記

陳協用

題王官谷

金高德裔

遊王官谷記

明呂柟

中條山部藝文二詩

條山蒼

唐韓愈

遊棲巖寺

李益

休休亭

司空圖

丁未歲歸王官谷

前人

歸王官谷次年作

前人

王官二首

前人

修史亭五首

前人

退棲中條

前人

留題王官谷

宋李釜

中條山

王禹偁

重經車輞谷

司馬光

王官谷司空侍郎故居

江休復

古今圖書集成

王官谷十詠

俞充

貽溪懷古十篇

井序

前人

遊王官谷

母流

休休亭

樂沆

棲巖寺

金張瓚

虞坂曉行

陳庾

遊王官谷

丁曄仁

懸泉

袁從父

王官飛湍

元陳賡

虞坂

前人

王官谷司空圖隱居

孔克堅

虞坂行

元好問

遊萬固寺

王惲

虞坂

前人

前題

段成己

前題

曹之謙

中條阻雨

前人

棲巖寺

劉弘遠

秋日登棲巖寺

明張循古

遊中條

前人

萬固寺賞蓮

徐孚

遊棲巖寺

賈濬

條山積雪

王翰

司空侍郎故居

前人

登中條山

薛瑄

春遊萬固寺

楊守禮

遊棲巖寺

張佳引

望方山

前人

遊曇延洞

前人

春日同呂子遊王官谷限春寒花遲四韻四首

王溱

王官谷

宋廷佐

登天柱峯

前人

王官谷漫成

前人

遊王官谷就宿石泉洞

丁守中

遊棲巖寺

孫昂雲

古今圖書集成
王官谷樂隱

許莊

中條山部紀事

中條山部雜錄

中條山部外編

山川典第三十五卷

中條山部彙考


左傳之王官

山海經之甘棗山

史記之薄

山襄山

中條山在今山西平陽府境內西北抵蒲州西抵夏
浮山二縣南抵芮城東北抵垣曲而北則跨解州及
臨晉安邑聞喜平陸諸縣其山名載於經史者不一
其山之嶺巖洞谷延袤於各州縣者其名亦不一而
總謂之中條山



中

九峰山

萬國寺

下方山

介谷

條山圖

五老峰

五柱峯

王官谷瀑布泉



古今圖書集成
考

按春秋左傳文公三年秦伯伐晉濟河焚舟取王官及郊註王官晉地

按山海經中山經薄山之首曰甘棗之山共水出焉而西流注于河其上多杻木其下有草焉葵本而杏葉黃華而莢實名曰蕓可以已瞢有獸焉其狀如跖鼠而文題其名曰韃食之已瘦

按史記封禪書自華以西各山七曰薄山薄山者襄山也註徐廣曰蒲阪縣有襄山索隱曰應劭云襄山

在潼關北十餘里穆天子傳云自河首襄山酈道元水經注薄山統目與襄山不殊在今芮城北與中條山相連是薄襄一山名也又正義曰薄音白落反襄音色眉反括地志薄山亦名襄山一名寸棘山一名渠山一名雷首山一名獨頭山一名首陽山一名吳山一名條山在陝州芮縣城北十里此山西起雷山東至吳坂凡十名以州縣分之多在蒲州今史文云自華以西未詳也

按魏書地形志河北郡南安邑註有中條山

古今圖書集成
按水經河水注水北出於薄山太史公封禪書稱華山以西名山七薄山有其一焉薄山卽襄山也徐廣曰蒲坂縣有襄山山海經曰薄山之首曰甘桑之山共水出焉揚雄河東賦曰河靈攬踢掌華蹈襄注云襄山在潼關北十餘里以是推之知襄山在蒲坂也按地理通釋十道山川攷河東名山雷首在河中府河東縣南十五里一名中條山唐司空圖居山之王官谷

按金史地理志河東南路河中府河東虞鄉註俱有

中條山

又解州芮城夏安邑

註俱有中條山

按明一統志山西山川中條山在平陽府蒲州東南一十五里此山跨平陸芮城安邑夏縣解州之境山有桃花元女二洞及谷口蒼龍等泉

按山西通志山川中條山在蒲州東南一十五里以其中狹而延袤不絕故名又以南北狹薄亦名薄山其陽跨芮城平陸其陰跨解州安邑夏聞喜垣曲諸縣解州境有膽礮窟二處又有桃花元女二洞及谷

古今圖書集成
口蒼龍等泉至夏縣境有洞石崖上書王溪頭三字
相傳司馬溫公嘗讀書於此水經注曰薄山卽襄山
也徐廣曰蒲坂縣有襄山揚雄河東賦曰河靈攬踢
掌華蹈襄注云襄山在潼關北十里
筆架山在蒲州南十五里中條之北面數峰排立拱
對州城中高末下形若筆架然

麻谷山在蒲州南三十里地名六管數峰相庇羣壑
皆輔氣象盤鬱林巒蔽空爲中條之勝
八盤山在蒲州南二十里中條之北面八折至頂轉

南卽爲歷山

鳳凰山在蒲州西七十里一云鳳山與潼關鳳山相
對爲中條之盡頭處

棲巖在蒲州南一十五里中條山內有棲巖寺

蒼陵谷在蒲州東南一十五里中條山陰之西麓

谷口在蒲州東南一十五里中條山陰之中麓

大谷口在蒲州東南一十五里中條山陰之東麓

中條山又在浮山縣東四十里南通翼城東烏嶺北
達岳陽草峪嶺而其東支遙接沁河界

古今圖書集成
堯山在浮山縣東八里卽中條之西麓巋然高出上
有帝堯廟因名古柏數株傳聞帝堯曾避暑於此
諸葛河在浮山縣北六里源出中條山
中條山又在臨晉縣南七十里

方山在中條山東與臨晉縣治對上有方田數畝泉
流涓滴草木蒼鬱老幼歲時往觀焉

王官谷在臨晉縣南七十里中條山中以王官廢壘
爲名春秋秦伐晉取王官及郊卽此巖洞深邃泉谷
幽奇有天柱掛鶴諸峰瀑布貽溪諸水山水之勝甲

於河東唐司空圖嘗隱居於此建休休亭自爲記又
有石硯竹逕修史亭一鳴窻諸勝

瀑布泉在王官谷天柱峯西懸流直下百尺餘經休
休亭入峰之東復有懸泉沿崖而下崖上蒼苔匝生
歲久皆玲瓏石如羊胃狀

靈泉亦出條山觀嶺下世傳李皮囊隱此時夏月山
久涸獨坐忽聞人言有頃半溪亂石間隱隱雷鳴泉
水奔流比常特異

中條山又在解州南五里西起蒲州東接太行南跨

古今圖書集成
州之平陸芮城北跨州之安邑聞喜夏縣

檀道山在解州南五里與中條山連接路通河南靈
寶縣寶津渡中有盎漿泉不流而止俗呼止渴泉
白徑嶺在解州南十五里中條山上有石左右參天
間不容軌名曰石門路通陝州大陽津渡水經注曰
鹽澤南面層山天巖雲秀池谷泉深左右壁立間不
容軌謂之石門路出其中名曰白徑南通上陽北暨
鹽池卽此也

解鹽池在解州東二里中條山麓長五十里東距安

邑縣南十里闊七里周迴百有二十里去平地深數
仞如盆底水常停滯滲漏潤下作鹹四時皆有鹽惟
盛夏風日炎烈生獨多且嘉故俗曰鹽池夏日近安
邑者爲解鹽東池中經路村城南二里爲解鹽中池
在解者爲西鹽池三塲亦因是名池內北百步許有
淡泉甘冽俗謂鹽須此水方結池外諸澗谷水皆四
來奔赴池水溢則鹽不生唐大曆間建池神廟宋崇
寧間遣觀察使王仲先於池東西南三面築七郎等
十一堰圍之以殺水勢明置轉鹽運司於旁

靜林澗在解州六小池西南十五里源出中條山頂
北流經紅臉溝可溉田餘流入臨晉洫水灘

中條山又在安邑縣南二十里

分雲嶺在安邑縣卽中條最高處嶺巔出雲東西分
布焉世傳尸鹽澤者也山頂舊有分雲祠

車輞谷在分雲嶺東兩山夾路盤礴多奇邑民文進
修治今爲坦途

二郎谷在車輞谷東中有仙跡多巖竇古洞

風谷洞在安邑縣南二十里分雲嶺西形若半井投

葉卽飛其風出則飛沙拔木

鹽風洞在風谷洞旁洞口若盆仲夏應候風出聲隆
隆然谷口舊有風神祠今廢

鹽池在安邑縣條山之陰縣治踞池陽之東偏運城
賓其中西趾解境縱約八里橫五十里深可數仞貯
水連天淤泥藉水鹽根藉泥根如蒼玉糾疊蝟起逼
肖太湖旱潦不鹽惟水五六寸許日曝結板水面生
花東南風盪墜板鹽成皜潔方正故曰斗鹽旱曾灌
七郎之水無益於涸潦嘗畦曬劣鹽遂禁不曬明末

古今圖書集成
鹽池屢遭水患各商分畦澆曬出鹽辦課今爲成例
水經注云地理志曰鹽池在安邑西南許慎謂之鹽
監長五十一里廣六里周一百一十四里今池水東
西七十里南北十七里紫色澄渟渾而不流出石鹽
自然印成朝取夕復終無減損唯水暴雨澍甘潦奔
洑則鹽池用耗故公私共竭水徑防其淫濫故謂之
鹽水亦謂竭水也故山海經謂之鹽販之澤也周穆
王漢章帝並幸安邑而觀鹽池

青石泉在安邑縣東南三十里出中條山由青石槽

經東郭入黑龍潭

車輞泉在安邑縣南二十里出中條山車輞谷中

中條山又在夏縣東五里

柳谷在夏縣南十五里中條山內唐陽城所隱之地
玉溪洞在夏縣東南七里中條山谷間有石洞深一
丈五尺闊一丈俯瞰溪流清淨可愛石巖鑿玉溪二
字溫公嘗隱此讀書又通谷村觀音寺後亦有洞塑
公像

中條山又在聞喜縣南六十里

湯山卽景山爲中條最高峯南望鹽池以上有湯廟
湫池禱雨多應俗呼爲湯王山按隋書地理志聞喜
有景山與三峴山皆中條支山水經注曰涑水又與
景水合水出景山北谷山海經曰景山南望鹽坂之
澤北望少澤其草多藎秦椒其陰多赭其陽多玉
郭景純曰鹽澤卽解縣鹽池也按經不言有水今有
水焉西北流注於涑水也

中條山又在芮城縣北十五里高二十里
又在垣曲縣西南九十里

三汭澗在平陸縣北五里中條山東西二溝流與澗
合故名

盤南澗在平陸縣東十里源出中條山由石槽溝南
下至盤南有澆灌之利下流入河

馬頭澗在平陸縣北四十五里中條山麓其地危峯
聳立兩谷二源環麓合流以山形肖像因名

響泉在平陸縣北四十里中條山東其水甘澄附近
民日以爲用俗稱響泉溝

按平陽府志山川中條山在安邑縣南二十里說者

謂西華嶽東太行此山當其中故云中條山海經爲中經條谷之山一名蒼梧山山產梧桐蒼玉竹書曰鳴條有蒼梧山舜崩蒼梧卽此

雲蓋峰在蒲州東三十里中條山之北面壁立萬仞高入雲表

玉洞在蒲州東南一百二十里中條之陽

老陳溝在蒲州南六十里中條山昔有陳姓者牧馬其中故名

柳溝在蒲州東南十五里棲巖寺東

大黃泉在蒲州東南十五里中條山北麓

梨花泉在蒲州東南十五里中條山大谷之中

龍母泉在蒲州東南十五里中條山大谷之中

天柱峰在臨晉縣王官谷南瀑布經其西

白雲洞在臨晉縣王官谷內元孤雲子李純夫所居構了了菴以擬休休亭者

胡村澗在解州張公泉東五里源出中條山陰

桃花澗在解州胡村澗東五里水出中條山頂

堡子谷在解州大水澗東二里源出中條山北流入

鹽池南溝

金盆水在解州出中條山趨鹽池南溝其東爲關帝祖塋亦名小聖溝又其東有小龍五澗水二郎三郎谷諸水皆出中條山陰北流

分雲山在平陸縣西北四十里中條山之一峰也層巒峻岫走霧分雲視諸山獨爲嵌崿尋幽眺遠或有取焉但路絕羊腸不易升也

清涼山在平陸縣東北六十里乃中條一脈晉執虜公於此其絕頂曠闊四望無際俗謂四州圪塔蓋蒲

解絳陝皆可目及也

吳山在平陸縣北五里中條山之支其山高平上皆民田南麓有吳泰伯廟蓋虞仲封此並祀泰伯故以吳稱焉

橫嶺在平陸縣北四十五里中條之脊西通解州東達夏縣南北自縣至運司一百里名車輞峪舊行鹽車今徑險仄不可行較青石槽稍近

甘棗山在芮城縣東北三十五里今名刺林溝中條之分名也

古今圖書集成
方山在芮城縣西北三十里峰巒高峻可與二華爭雄

太峰在方山東

百二十盤在芮城縣北山之陰石磴盤旋而下故云其徑北達臨晉卽唐司空圖所隱王官谷也

直岔嶺在芮城縣東北六十里甘棗山東今亦名橫嶺中條山之巔也路通南北孔道

條山之尾在垣曲縣西南九十里迤邐至郭南里許拱向縣治爲案下臨黃河上有洪慶觀又建觀河亭

焉

按蒲州志山川中條山在州東南十五里卽雷首山上
山上有棲巖萬固等寺谷口蒼陵等泉有題咏

古蹟李樂營在中條山南漢興平二年十二月獻帝渡河幸李樂營河東太守王邑獻綿帛

瑞雲亭在州南中條山上宋時建今廢

望川亭在州東南中條山上棲巖寺前宋宣和二年建西望秦川如在几席明萬曆十年王崇古重修避暑樓在中條山棲巖寺隋仁壽元年勅建今廢

古今圖書集成
寺觀萬固寺在州東南一十五里中條山麓唐大中八年建初名建元後改今名

棲巖寺在州東南二十里中條山之上後周建德中建

按浮山縣志山川中條山俗名爲橫嶺在縣東四十里

按臨晉縣志山川中條山在縣南六十里西自蒲州之草坪頭東至解州之紅臉溝靜林寺東西凡四十里其支山爲方山一名檀道山山海經云檀首山水

經注云鹽道山亦名百梯山其頂方平故又曰方山與縣治對峒嶢插漢爲中條之首五老峯亦俯其下山頂舊有靈峰寺唐宋金元爲未樂虞鄉兩縣勝地號大叢林宋廢未樂元廢虞鄉寺遂荒頽矣

王官谷虞鄉城東南十里左傳文公三年秦伐晉取王官及郊呂相絕秦書曰俘我王官是也唐司空圖有先人別墅在焉值唐末喪亂遂隱不出山居記云谷之名本以王官廢壘在其側今司空氏易之爲禎陵溪亦曰禎貽溪

古今圖書集成
祠廟聖人殿中條山下洗馬村東明嘉靖間華州生員陳道周隱居寓此建廟塑孔子四配十哲像奉事萬曆間其弟子陶尚和等重修

按解州志山川中條山在州南五里山勢巉巖峻拔自王官谷東二十里紅臉溝爲州西境溝西上有靜林寺在山翠微間古柏森蔽寺東十五里爲桃花洞在州西南七里昔人見洞旁泛桃花故名洞東三里爲白龍谷東上八里爲直岔嶺稍東爲荻子谷又稍東爲五龍谷在州正南五里其東岫有石巖巖水懸

下如噴雪俗曰石巖噴雪其巖上有酒島字谷口西上十五里爲橫嶺卽中條山脊路通南北孔道但去村落遙遠地最荒涼明萬曆間芮城知縣趙廷琰創建關帝廟招道流居之其下有弓張溝又東爲堡子谷又東爲仙女洞亦名元女洞以其中積水成潭又名黑龍潭雩禱有應潭東十里爲大虎谷谷中有將軍堡堡後有鳳凰嘴嘴西過連雲棧至橫嶺有陽關寨寨後有膽礮窟其旁有百藥草又東南爲檀道山其下爲檀道谷谷中有盎漿泉不流而止東亦有膽

古今圖書集成
礬窟路通河南靈寶涇津渡又東南爲白徑嶺雙石
壁立左右參天中不容軌亦名石門又東十五里爲
分雲嶺嶺巔出雲東西分布世傳尸鹽澤者也宋宣
和間有成寶公廟今廢嶺下爲風谷洞若半井投葉
卽飛其風出則飛砂摧木旁有鹽風洞洞口若盆每
仲夏應候風出其聲隆隆俗謂之鹽南風鹽花得此
一夕成鹽其上有天井山谷口舊有風神廟又東爲
車輞谷谷有銀砂洞有禁又東爲二郎谷嶺多古洞
又東爲虞坂一名鹽坂俗曰青石槽在安邑東郭村

南卽晉荀息假道於虞以伐虢伯樂逢騏驎困鹽車
處明御史張士隆開修可通鹽車坂東爲巫咸頂俗
曰瑤臺頂商相巫咸巫賢所隱處孤峰峭拔蒼翠摩
空下有巫咸祠旁有巫咸谷谷中有水亦名巫咸水
在夏縣東五里又東十五里爲柳谷唐陽城所隱處
又東二十里爲鳳凰山東爲湯山上有湯廟下有郭
璞書堂山亦產銅在聞喜縣南八十里湯山東爲秦
王嶺上有鎮風塔蠶姑廟又東二十里爲盤盤山在
聞喜縣南五十里又東二十里爲紫金山又爲鳳凰

古今圖書集成
原由東而北爲峩峩嶺高二里形如峩峩土厚宜藝
五穀在聞喜縣東由北而西爲玉鉤山在安邑縣東
北二里狀如玉鉤又西爲鳴條岡卽湯伐桀地北爲
峩峩坡東自曲沃西抵黃河其陽跨聞喜夏縣安邑
猗氏臨晉榮河州之北境亦倚其勢焉又北爲孤山
其下爲安邑之相里又北爲稷神山在稷山縣南五
十里上有稷神廟后稷始播穀於此而山陽多夏縣
聞喜之地又南爲紫金山在州北二十里舊產人參
峩峩坡在州東五里鹽池北岸逍遙坡在州西北二

里爲女鹽池北岸雷首山南迤東三十里爲歷山在
州之芮城縣北歷山東北三十里爲青龍洞洞有青
龍泉旱禱必雨洞東二十里爲甘棗山東十里爲石
鍾洞世傳石鍾煉士修道於此頂懸一石如鐘水注
其下又東五里爲清涼寺又東十里爲娥英廟又東
爲虞芮二君祠下有所讓閒田又東爲吳山中條山
之支在平陸縣西北五里其山高平上皆民田其南
麓有吳泰伯廟故名蓋虞仲封此並祀其先泰伯而
稱吳邪東爲傅巖卽殷相傳說隱處旁有聖人澗澗

古今圖書集成
東十里則爲砥柱峰又名三門在黃河中流其形如柱高二丈餘砥柱旁有老君爐其東岸集津西有禹廟又東四十里爲箕山山峰高峻勢類箕故名山下有許由塚清澗在箕山之南卽巢父洗耳處東有白玉竅號錫窟東北爲王屋山

按安邑縣志山川中條山在縣南二十里西自蒲坂迤邐而東接太行王屋諸山盤踞數千里在縣境者絕巘奇峰如揖如拱天然圖畫名巒峻巘層見疊出故不得析登而總名中條山

按聞喜縣志山川中條山在縣南六十里西起蒲州雷首東接太行巉巖峻拔歷代相傳爲中條者以其居河曲之間延亙不絕故名西界夏縣東界垣曲在邑境者廣袤皆四十餘里物產頗多雲興則爲雨候晴則望如翠屏

八景條山浮翠巘峩南峙上接瑤天凡在邑境皆能眺望若遇氣候晴明嵐光藹藹翠微蔥蔥宛如列屏當面

湯寨靈池湯寨爲中條絕嶮石壁萬仞人苦攀援春

古今圖書集成
暮花開望如簇錦上有湫池徑丈許其水旱不涸澇不溢可方華嶽洗頭盆故曰靈池

郭堂泉滴條山之麓有巖焉豁訝洞豁縱廣丈餘內有懸泉一滴相傳郭景純讀書時置硯其下以泉滴爲硯池水云

按芮城縣志山川中條山在縣北十五里西起首陽東接太行南北狹薄延袤不絕如條故曰中條又曰薄山八景爲條山滴翠

祠廟嶺上關帝祠條山要路之水多盜明萬曆四十

年趙廷琰創建因而感泉出焉

按垣曲縣志山川中條山在縣治西南九十里迤邐至郭南里許爲條山尾

寺觀洪慶觀在縣治南一里許中條山之東麓舊名金闕院金大定十九年道士呂道章創建元延祐六年重修

按平陸縣志山川中條山在縣北四十五里西起雷首東接太行壯麗崔巍勢雄嵩華一邑形勝之大者古蹟鹽坂在縣東北七十里中條山卽伯樂逢騏驎

困鹽車處今名青石槽

石門在縣西北四十里中條山嶺勢凌虛地形險阻今王家井西北十里許有黃嶺石門卽其地也

上陽城在縣西南二里條山之麓東面卽金雞堡故城基址仍存春秋時名爲岩城上陽係虞之塞邑也晉滅虢以火攻之見于左傳

按夏縣志山川中條山在縣東五里東則太行西則太華此山居中因名起自蒲坂迤邐而北隨在異名蟠據數千里莫知所終崇聳廣大爲邑具瞻

虞坂山在縣南十五里中條山俗名三橋坡平陸縣古虞國此路通平陸故名卽春秋晉人假道於虞以伐虢者

白沙河一名巫咸河發源中條山出巫咸谷經邑南關外西流三十餘里南轉會入姚暹渠

欽定古今圖書集成方輿彙編山川典

第三十六卷目錄

姑射山部彙考

圖

考

姑射山部藝文一

姑射山遊記

姑射山部藝文二 詩

遊姑射山神居洞

明喬宇

元王暉

北洞

前人

九日姑射山登高

明李咨

藐姑射山水亭

王崇古

遊藐姑射山

呂陽

春夜宿蓮花洞

前人

遊藐姑射山

裴邦奇

宿蓮花洞

前人

姑射龍子祠同角東賦

前人

姑射山獨酌憶士登

何出光

遊姑射山

黃克纘

登藐姑射山懷神人

邢雲路

宿姑射洞

前人

仙人跡

有序

前人

龍子祠清音亭

前人

姑射晴嵐

梁綱

姑射山部紀事

姑射山部雜錄

姑射山部外編

古今圖書集成
壺口山部彙考

圖

考

壺口山部藝文一

壺口賦

明黃光燁

壺口山部藝文二 詩

觀壺口

明張應春

壺口秋風

前人

前題

陳維藩

山川典第三十六卷

姑射山部彙考

山海經之列姑射 莊子之藐姑射

姑射山在今山西平陽府西三十五里與三磴山平
山石孔山相連絳州襄陵太平汾西稷山諸縣皆在
山之東即山海經所謂列姑射莊子所稱藐姑射之
山也山有姑射蓮花二洞姑射洞又名神居洞相傳
其中時有奇人居之

古今圖書集成
姑射山圖



考

按山海經海內北經列姑射在海河洲中註山名也

山有神人河洲在海中河水所經者莊子所謂藐姑

射之山也按此云在海中似與本部姑射山無涉但郭註引莊子為證志皆從之故採入備考

按莊子逍遙遊藐姑射之山有神人居焉肌膚若冰

雪綽約若處子不食五穀吸風飲露乘雲氣御飛龍

而遊乎四海之外其神凝使物不疵癘而年穀熟之

人也之德也將旁礴萬物以為一世斬乎亂孰弊弊

焉以天下為事之人也物莫之傷大浸稽天而不溺

大旱金石流土山焦而不熱是其塵垢粃糠將猶陶

鑄堯舜者也孰肯以物為事

按隋書地理志臨汾郡臨汾註有姑射山

按唐書地理志晉州平陽郡臨汾註有姑射山

按元和郡國志平山一名壺口山今名姑射山在晉

州臨汾縣西八里

按路史後紀帝堯禮聖姑射拜師沮洳註姑射山在

臨汾廣固北平陽界曰平山是為壺口山冀州圖經

云西入文成郡以山為界有故堯城及堯祠述征記

堯巡狩登此山

按金史地理志河東南路平陽府臨汾註有姑射山

又趙城註有姑射山

按明一統志山西山川姑射山在平陽府城西五十里山有姑射蓮花二洞卽莊子所謂有神人居者山之間有分水嶺

按山西通志山川姑射山在平陽府城西三十五里山有姑射蓮花二洞卽莊子所謂藐姑射之山有神人居者是也神居洞卽姑射洞政和八年勅立元王

憚有遊姑射洞詩

石孔山在府城西三十五里姑射山前九孔相通深不可測

平山在府城西南二十五里卽姑射山之支也平水出焉山海經云平山平水出於其上潛於其下是多美玉

姑射山又在襄陵縣西十二里

又在太平縣西十五里

又在汾西縣西六十里一名青山乃姑射之連阜山

古今圖書集成
產鐵上有姑射真人祠

又在絳州西北四十里

按平陽府志山川姑射山在絳州西北四十里南華經云堯見四子藐姑射之山卽此

又在稷山縣北二十里上有姑射洞其山石壁巉岩峯巒聳秀雨霽嵐光足稱奇勝

按臨汾縣志山川姑射山在城西三十五里前九孔相通一名石孔山

按太平縣志山川姑射山在縣西十五里自北而南

列如翠屏然

按襄陵縣志山川姑射山在縣西十二里三磴山之北以姑射仙人故名

平山姑射分支其山下出泉派分十二官河灌臨襄二縣民田建祠崇祀勅封爲平水泉之神卽今之龍祠

按汾西縣志山川姑射山在縣西六十里奇峰聳漢四望諸嶽如崕嶺舊有藐姑仙人祠新建真武殿按絳州志山川姑射山在州西北四十里南華經云

堯治天下之民平四海之政往見四子藐姑射之山
卽此

按河津縣志山川姑射山在縣東北接稷山絳州境
三十五里 按稷山縣志與府志同

壺口山部彙考

禹貢之壺口

壺口山在今山西平陽府吉州之西七十里大寧縣
馬鬪關之南二十里其山西崖之脚盡受黃河之水
傾瀉奔放自上而下勢如投壺故名壺口昔唐堯時
大禹治水卽始于此今每逢秋漲波濤洶湧震動遠
近洵稱宇內奇觀



壺口山圖



考

按書經夏書禹貢既載壺口治梁及岐傳蔡壺口山名

漢地志在河東郡北屈縣東南今隰州吉鄉縣也

按漢書地理志河東郡北屈註禹貢壺口山在東南

應劭曰有南屈故稱北屈

按後漢書郡國志河東郡北屈有壺口山註禹貢曰

壺口治梁及岐

按水經汾水注汾水南與平陽合水出平陽西壺口

山尚書所謂壺口治梁及岐也

按地理通釋十道山川攷壺口山在慈州吉鄉縣郡

縣志平山一名壺口山今名姑射山在晉州臨汾縣

西八里

按金史地理志河東南路平陽府臨汾註有壺口山

汾水

按明一統志山西山川壺口山在平陽府吉州西七

十里禹貢既載壺口即此

按山西通志山川壺口山在平陽府吉州西七十里

禹貢曰冀州既載壺口又曰壺口雷首至于太岳蓋

古今圖書集成
河勢北來至此全傾西崖之脚奔放而下約五六百尺懸注漩窩如一壺然

又在大寧縣馬鬪關南二十里孟門之上

按平陽府志山川壺口在吉州西形勢如壺黃河之水盡注于中

關津龍門飛橋在吉州西七十里壺口石峽上元末於石鑿孔樹椿往返纏以鐵索上架板橋以渡大兵按吉州志山川壺口在州西七十里形勢如壺黃河注於其中禹貢壺口卽此每春秋時有氣如虹橫浮

水上鄉人遂以爲神或亦日影之所射也明知州黃光煒有賦

八景壺口秋風所謂秋風者因黃河之水注於其中其勢甚險每遇秋時波濤洶漲風氣凜烈故云

按大寧縣志山川壺口在馬鬪關南二十里孟門之上河流注此形如一壺故名壺口

